



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

47. Kalenderwoche – ab 22. November 2009

Hunde, Kinnor, Audos...

Hunde sinn an dor Leine zu fiehrn! Das is doch schon immor so gewähnsn. Gloop isch.

Rischdische Hundefreinde ham da abor was dageeschn. Die dun ihre Hunde liehm un wolln dähn ooch e bißl Schbaß un Freiheit genn. Wenn mir nu ma jezde de Freiheit ham, warum denne dann nisch ooch fiehr Hunde? Freiheit is immor de Freiheit dor andorn!

Ohgeeh, abor wenn disch dann so e freior Hund anfalln dud un du mussd disch mid dähm rumbalschn... un dähr beißd dir in dähn Hindorn odor annersch wohin... da heerd dann abor dor Schbaß ganz schnell off. Bissische Hunde dun de Freiheit nisch vordien!

Abor nu duds ja ooch so ganz nedde Hunde gähm... gud erzochn... brav... dreihärzisch... bei die is de Leine werglich nisch needisch! Die ham de Freiheit vordierend.

Bloß währ will nu entscheidn, welschor Hund an de Leine muss un welschor nisch? Es dud ja soviel unnorschiedliche Hunde gähm - Bludhunde, Jachdhunde, Schoßhunde, Schweinehunde, Daggl, Gambfhunde, Möbse... un es dud ooch dähn Gommissar Reggs gähm! Die kannsde ja nisch alle in een Dobb schmeißn - was de Gefährlichkeed bedreffn dud. Ma jezde abgesähn dadervon, wenn Hunde als Nahrungsmiddl dien dun - wie in Schiena. Da duds dann bloß off de Greeße ankomm. Also, off de Greeße vom Hund im Vorhändnis zum Dobb!

In welschn Dobb nu e Hund geheern dud, das kann eischendlich bloß dor Hundehaldor selbor entscheidn. Dähr muss wissn, ob sei Hund gefährlich is odor nisch. Un dor Hundehaldor muss nadihrlisch ooch beschdrafd wern, wenn sei Hund jemand anfalln dud. Dor Hundehaldor muss sein Liebling so erziehn, dassor brav is un keen Bleedsinn machd.

Isch meene, deine Kinnor mussde ja ooch so erziehn, dass die annorn Leidn nischd dun! Odor ooch Hundn... odor Kadzn... odor Omas... odor annorn Kinnorn!

Kinnor kenn ja ooch ganz scheen gefährlich sein. Gefährlicher als wie Hunde!

Wobei - wenn de Kinnor von jemand was Schlimmes vorabfn dun, da wern eischendlich de Eldorn, also de Kinnorhaldor bloß ganz seldn zur Vorantwortung gezochn. Eldorn hafdn fiehr ihre Kinnor - dud das eischendlich noch geldn? Bei Hunde duds geldn!

Ooch bei Audos! Un fiehr Audos mussde ja sogahr een Fiehrerschein ham.

Villeischd däde das ooch fiehr Kinnor un Hunde guhd sein! Also, isch meene, währ so gefährliche Sachn ham will, wie ehm Audo, Kinnor odor Hunde, dähr muss vorhähr een Fiehrerschein machn, wo mor lern dud, wie mor sowas fiehrn muss, damid annorn Leidn nischd bassierd. Wo mor lern dud, ob mor sei Kind odor sein Hund frei rumloofn lassn kann. Nee, bloß weils ehm ooch unerzochne Hunde gähm dud - alle an de Leine! Das is doof. Das däde genau so doof sein, wenn de alle Kinnor... weils ehm ooch ungezochne Kinnor gähm dud... un es dud ja ooch unnor de Erwachsenen... nee, mid Leinenzwang dusde nischd ausrischdn! Erziehung is alles!

Eduard Sachsenmeyer